

Visoki predstavnik se založio za nastavak međunarodne podrške BiH

Put Bosne i Hercegovine ka stabilnoj i prosperitetnoj budućnosti može se deblokirati ukoliko bi politički lideri zemlje vrijedno radili na postizanju kompromisa i rješenja u korist građana koje predstavljaju. Međunarodna zajednica će nastaviti podržavati pozitivne političke inicijative i sprečavati pokušaje osporavanja ili podrivanja države, rekao je visoki predstavnik tokom sastanaka s litvanskim zamjenikom ministra vanjskih poslova Andriusom Krivasom danas u Vilniusu, i latvijskim ministrom vanjskih poslova Edgarsom Rinkevicsem u ponedjeljak u Rigi.

“Ogromna većina građana u Bosni i Hercegovini želi da politički lideri ubrzaju napore ka ispunjenju međunarodnih obaveza i osiguraju da zemlja ide ukorak s ostatkom regije. Uvjeti postavljeni za evroatlantske integracije otvaraju put ka stabilnoj i prosperitetnoj budućnosti za Bosnu i Hercegovinu. Od presudne je važnosti da se postigne značajan pomak kako bi se zemlja vratila na pravi put”, rekao je visoki predstavnik.

U sklopu posjeta baltičkim zemljama, Valentin Inzko se također sastao s visokim zvaničnicima u Estoniji, Latviji i Litvaniji, koja trenutno predsjedava Vijećem Evropske unije. Sastanci su bili prilika da visoki predstavnik ukaže na potrebu za nastavkom međunarodne pomoći za Bosnu i Hercegovinu.

Foto: Visoki predstavnik Inzko i ministar vanjskih poslova Latvije Rinkevics (izvor: Ministarstvo vanjskih poslova Latvije)